

Placi Deragisch-Hitz, Gonda



Ils 8 da december 1996 annunzia il tuchiez da s.Vigeli la mort da nies convischin Placi Deragisch, sesents en casa da vegls s.Vigeli. Suenter ina veta plein humor, buontad, lavur e quitaus eis el sedurmentaus ruasseivlamein suenter cuorta maldispostadad ella biala vegliadetgna dad 83 onns.

Il Placi ei naschius ils 13 d'ust 1913 a Sedrun sco fegl dad Emanuel Deragisch e Tresa naschida Schmid. El ravugl d'ina buna famiglia, ensemen cun sias sis soras ha el senza dubi passentau ina biala affonza. Frequentadas las scolas dil vitg ei il Placi passaus cun curascha viado el travagl dalla veta. Abstrahau dil temps da survetsch militar, ha el

passentau sia entira veta, dalla tgina alla mort, ella Val Tujetsch. Siu da viver ha el fatg cul mistregn da scrinari e cun dasperas aunc far in techet il pur.

Igl onn 1943 marida el la Lucia Hitz da Rueras. Treis buobas ed in buob ein il plascher dils giuvens geniturs. Quels portan quitaus, denton era bia legria e plascher.

Il Placi fuva in um da cumpignia. Gest perquei eis el s'engaschaus pil beinstar dalla publicitad, oravontut allas uniuns. Aschia eis els staus 36 onns commember dalla Societad da musica, cantau buca meins che 38 onns el Chor baselgia Sedrun e da quei da varga diesch onns commember dil Chor mischedau Sedrun. Plinavon eis el s'engaschaus per l' Uniun samaritana, sco fundatur ed instruider e quei duront decennis.

Denton siu pli grond plascher fuva il far teater humoristic. Tier il mussar e far teater ha el era scret numerus tocs humoristics ch'ei vegni menai si en ed ord Tujetsch. Perdetga da sia activitad poetica dat era ina cudischet cumparius avon entgins onns.

Igl onn 1990 piarda el sia consorta Lucia. Suenter entgins onns persuls a casia sto el serender en casa da s.Vigeli. Leu astga el passentar la beinmeritada sera dalla veta.

Ils 10 da december vegn el accumpignaus da numerus vischins e vischinas sin santeri da s.Vigeli. In original, in um plein humor e carezia ei buca pli. Ad el pasch e legria celestiala.